


四朝聞見錄附錄

三





四朝聞見錄

附錄

(三)

葉紹翁撰

叢書集成初編

(補印本)

四朝聞見錄

附錄

三冊

一九三七年十月初版

一九五九年十月補印

葉紹翁撰

商務印書館出版

上海大眾文化印刷廠印刷

四朝聞見錄戊集

岳侯追封

人主無私予奪。一歸萬世之公。天下有公是非。豈待百年而定。眷言名將。宿號蓋臣。雖勳業不究於生前。而譽望益彰於身後。緬懷英概。申畀愍章。故追復少保。武勝軍節度使。武昌郡開國公。食邑六千戶。實封二千四百戶。贈太師。諡武穆。岳飛。蘊蓋世之才。負冠軍之勇。方略如霍嫫姚。而志滅匈奴。意氣如祖豫州。而誓清冀朔。屢執訊而獲醜。亦運籌而策勳。外攝威靈。內殫謨畫。屬時講好。將歸馬華山之陽。爾猶奮威。欲撫劍伊吾之北。遂致樊蠅之集。遽成市虎之疑。雖懷子儀貫日之忠。曾無其福。卒墮林甫偃月之計。孰拯其冤。迨國論之初明。果邦誣之自辨。中興之主。思念不忘。重華之君。追褒特厚。肆渺躬而在御。想風烈以如存。是用頒我絲綸。綬之王爵。錫熊紅之故壤。超敬德之舊封。蓋將慰九原之心。亦以作三軍之氣。於戲。修車備器。適當閒暇之時。顯忠遂良。罔閒幽明之際。尙惟泉壤。歆此寵光。可特封鄂王。餘如故。嘉泰四年六月二十日。中書舍人李大異行。蓋韓氏與師恢復。故首封鄂王。以爲張本。制中故有作三軍之氣。與

修車備器之詞。

按制詞有與今本金陀粹編所載字句小異。附刊卷末。

考異

此制乃金陀粹篇第二十七卷所載。金陀粹編乃王孫珂所載。決不致誤。而紀聞者以李公大異爲顏械。其誤甚矣。嘉泰閒岳侯之死僅八十年。故有天下有公是非。豈待百年而定之語。謂必待百年而定何也。蓋紀聞者治賦。若如所載。僅一無用韻語。一作原韻。起句耳。恐史官誤采其說。故載詳云。

遺事

開禧初。降詔興師。李公壁草起句云。天道好還。蓋中國有必伸之理。人心助順。雖匹夫無不報之讎。累詞殆將數百。予侍叔父貢士泳。自浦城行至都之玉津園前。售募詔而讀之。叔父曰。以中國而對匹夫氣弱矣。其能勝乎。已而兵果大敗。金因亦有僞詔。詆韓侂胄云。蠢爾殘昏。巨迷。此句疑有脫文。輒鼓兵端。首開邊隙。敗

三朝七十年之盟好。驅兩國百萬衆之生靈。彼旣逆謀。此宜順動。尙期決戰。同享升平。

畢再遇

再遇臨安西溪人。淳熙閒。以勇名于軍。精悍短小。蓋驍將也。開禧兵罷不支。再遇奮于行伍。年已六十。披髮戴兜鍪。鐵鬼面。被金楮錢。建旗曰畢將軍。敵騎望其旗。已相顧愕視。再遇乘之。出入陣中。萬死莫敵。蓋先是敵中有畢將軍廟。甚靈異。其後浸以不靈。其形又絕肖。具登其號于旗。敵兵以爲本國之神。湖海賊作。再遇爲淮東招撫使。建治于揚州。雖殺戮過當。而賊亦旋定。嘗延客高會。取賊肝胃烹而薦酒。又擒其

魁用火尺烙其背爲基笛琴絲之類。再遇不善書。其弟再頗能書。嘗爲其贊畫于內。朝命再遇釋印入覲。留都亭驛。其弟嘗汚其寵妾。因酒大悖。再遇不能忍。以鐵尺殺之。具奏聞于上。待罪。且謂再非同產。蓋義兄弟。有旨放罪。未幾臺臣以其被召。乃以軍容入國。且及其手殘同氣。有旨徙之雷川。繼而又論其在淮爲招撫日多糜金錢。以饋過客。追十六萬緡。寓於雷之軍帑。再遇以田券折納于有司。僅得十萬。守臣楊長儒一作憐之。爲代納六萬云。【原注】其詳見李常簿著說議。

周虎

虎。平江人。今有武狀元坊。則其家也。黃公由以進士第一人。旌其坊爲狀元。故用武字以別之。虎儻有大將器。身兼文武。能賦詩。工大字。開禧間守和州。敵騎蔽野。居民官軍無以爲食。城欲下者屢矣。其母夫人自拔首飾奩具。巡城埤。徧犒軍。使盡力一戰。命虎同士卒甘苦。與之俱攻圍。以出戰。士卒感其誠意。遂以血戰。敵騎幾殲。上守城功歸于母。朝命封以和國。賜冠帔云。虎之居吳也。言者以爲韓黨。坐安置。州虎旣貧。不能將母以往。未幾謫所聞訃。號慟誓不復仕。放還。杜門托臂疾。屢召不起。雖舊所部候之。亦堅不與接。但啜于庭而去。

田俊邁

【原注】事略見前集。

俊邁當開禧北伐。七日之間。攻破宿州。下靈璧虹縣。先鋒甚銳。郭杲兵敗。乞和于敵。敵曰。我不要別物。但

要俊邁。梟縛俊邁往。其子訟父冤。梟坐是斬于丹陽市。賜俊邁諡。官其二子。賜宅一區。

開禧施行韓侂胄御批黃榜

開禧三年十一月三日聖旨。韓侂胄久任國柄。粗罄勤勞。使南北生靈枉罹凶害。以致敵人專以首謀爲言。不令退避。無以繼好息民。可罷平章軍國事與宮觀。陳自強專務阿諛。不恤國務。一作可罷右丞相。日

下出國門。前一日錢象祖、衛涇、李壁以御批付殿前。夏震震至日。遣其將鄭發截韓于六部橋。至玉津園。遂以鐵鞭擊死之矣。【原注】誅韓本末已載丙集韓誅後三日。皇子威武軍節度使開府儀同三司榮王臣劄奏。輒瀝

危衷。仰干天聽。臣竊伏自念至愚不肖。獲共子職。仰戴天地父母覆育之恩。蚤夜以思。未知報稱萬分之一。今日之事。有繫國家安危大計。勢甚可慮者。不敢不亟陳于君父之前。臣伏見韓侂胄久任國柄。粗罄勤勞。第以輕信妄爲。擅起兵端。蹂踐沿邊郡邑。室廬焚毀。衣食破蕩。父子夫婦離散。不能相保。兵連禍結。蠹耗國用。疲困民力。生靈無辜。殞于鋒鏑之下。不可勝計。死者冤痛。生者愁苦。海內之民。無不切齒忿嫉。歸咎于侂胄。蓋其權勢足以錯天下之口。而不敢言。臣而不言。死有餘罪。況今敵情叵測。專以首謀爲言。若不令其退避。使之循省誤國之愆。必致上危宗社。重累君父。臣此身亦何所容。是敢冒昧奏陳。欲望聖慈。特發睿斷。罷侂胄平章軍國事。與在外宮觀。日下出國門。安邊繼好。保邦息民。實在此舉。宗社幸甚。天下幸甚。所有陳自強專意阿附。備位無補。欲望並賜罷斥。如臣言可采。乞速付三省施行。干冒天威。臣無

任云云十一月三日三省同奉聖旨並依。

罷韓侂胄麻制

門下朕圖回機政。委用柄臣。遠至邇安。所賴經邦之益。力小任重。難逃誤國之誅。揆以羣情。奮由獨斷。爰誕敷于免冊。庸敷告于治朝。太師平章軍國事平原郡王韓侂胄。早以勳門。浸登顯路。久周旋于軒陛。適際會于風雲。服勞王家。意前人之是。似預聞國政。殆故事之所無。位極王公。職兼文武。宜思靡盬之義。用答非常之恩。而乃植黨擅權。邀功生事。不擇人而輕信。不量己而妄爲。敗累世之權盟。致兩國之交惡。三軍暴骨。萬姓傷心。列聖有好生之德。爾則專于嗜殺。朕躬有悔過之實。爾則務爲飾非。公事誕謾。會無顧忌。遂致敵人之未戢。專以首謀而爲言。臨機果見。一作料理明既無半策。得君專行。政久徒積衆愆。倘令尙處以廟堂。何以遂安于社稷。欲存大體。姑畀真祠。庸少慰于多方。以一新于庶政。於戲威福惟辟。朕方親總于大權。明哲保身。爾尙自圖于終吉。往哉。一作其祇若。茲謂優容。可罷平章軍國事。依前太師永興軍節度使平原郡王。特授醴泉觀使。在外任便居住。食邑實封如故。罷自強制云。以道事君。所冀贊襄之益。朋姦罔上。乃辜委寄之隆。殊拂巖瞻。宜從策免。特進右丞相兼樞密使秦國公陳某起云云。

沈厚之略。亟用是宜。豈期胡廣無蹇諤之風。優禮何補。粵從言路。進秉國均。不思洗心之忠。徒附炙手之勢。以庸庸爲上策。以唯唯爲善謀。賄賂公行。廉恥俱喪。鐘鳴漏靜。一作盡而行且勿止。鼎折餗覆。而任何以

勝暨權臣。輕啓于釁端。與鄰境頓乖于和好。內郡竭于糧餉。邊城瘠于干戈。誰無憂時之思。獨爲保位之舉。擬而言議。而動悉付括囊。危不持顛不扶。殆成橈棟。尙不亟從于退黜。必將愈積于罪愆。爰解軍樞。俾奉香火。猶以股肱之舊。務全體貌之存。於戲。乞骸骨以避賢。已昧滿盈之戒。歸田里而思過。無忘循省之誠。往服寬恩。益祇明訓。可罷右丞相樞密使。依舊秦國公醴泉觀使。在外任便居住。自強自出國門。每朝必朝服焚香。自云。從天乞一日之命。行至浦城。其族人陳政一作和爲宰。迎勞于郊。自強太息曰。賢姪賢

姪。大丈夫切不可受人大恩。雪涕而去。自強本太學諸生。嘗居韓氏館。實訓侂冑。憲聖女弟魏夫人實侂冑母。見其舉止凝重。交遊不妄。嘗器重之。謂侂冑曰。他日得志。必用之。陳登科爲光澤丞。其年已六十矣。主簿張彥清登科最早。而其年方盛。嘗玩侮之。楊開國圭。彥清之友也。嘗訪彥清。因以讖自強。每敬陳不敢狎。因私語陳曰。子姑自重。以相法論之。不十年爲宰相矣。自強以爲彥清諷圭玩已。而又以圭平日無狎語。姑信之。及自強爲丞。去官調闕。知韓已得柄。漫往候之。刺入。侂冑約以來日從官來見。當延接。自強不測其意。明日又漫往。侂冑于羣從官中前設褥拜自強云。許多時先生在何處。翌日從官卽交章特薦入臺。不期年遂拜相云。【原注】圭事已載前集。自朝廷以岳侯賜第爲太學。有善司聽者。聞鼓聲謂學中永無火災。亦

不出宰相。久之自強破讖而相。自是以諸生致宰相者相望矣。陰陽拘忌之說可信乎。彥清亦往候自強。憐其選調欲薦之。韓其子語之曰。爺不記光澤之事乎。真文忠銘彥清墓。謂其不趨附自強。此殆過也。文

忠中宏博。由劍南判官召入爲國錄。寓于圭之酒官舍。卽今之清風坊。彥清實于是年見自強。子所目視。一作親目云。

臣寮雷孝友上言

臣聞書曰惟辟作福。惟辟作威。惟辟玉食。臣無有作福作威。臣之有作福作威。害于其家。凶于其國。人用側頗僻。民用僭忒。釋之者曰。君臣之分。貴賤有常。政當一統。權不可分。作福作威。謂秉國之權。勇略震主者也。人用側頗僻。民用僭忒。謂在位小臣。見彼大臣威福由己。由此之故。皆附下罔上。亦有因此而僭差。夫箕子告武王以洪範。陳天地之大法。而獨于此諄諄其嚴。凜乎其不可犯。真足以垂戒萬世。且以作福作威而害家凶國。禍已如彼。而況征伐自天子出。聖有明訓。人臣而可專之。以貽禍天下哉。臣仰惟陛下。天資仁孝。身履恭儉。率循禮法。一作率禮守法。畏天愛民。未嘗有一過舉。以韓侂胄。獲聯肺腑。久侍禁密。見其平

時。小心畏謹。故每事詢訪。覬有裨補。侂胄所宜銜。一作仰。戴恩遇。勉自抑畏。密勿彌縫。圖報萬一。而席豐膏

粱。不學無術。任重力小。輕躁自用。陛下少加假借。侈然驕肆。竊弄威福。恐人有欲議己者。乃首借臺諫以鉗制上下。除授之際。名爲密啓。實出己私。而姦險之徒。亦樂爲之鷹犬。臺諫之官。使誠出于天下之公選。人生之親摺。論議奏章。允叶人心。聽之可也。今專植私黨。任用匪人。凡有所言。無非一作不。陰授風旨。而每

告陛下。必謂臺諫公論不可不聽。自是威福日盛。無復忌憚。稍有異己。必加擯斥。以專擅朝政。干分敗常。自知其無所容。乃巧圖兵柄。以爲固末之策。撰造閒謀。輕絕和好。遽起兵端。逆曦之任殿巖。侂胄交通狎昵。蹤跡詭祕。人已竊議。當孝宗在位之日。以吳氏世掌兵權。聖慮高遠。吳挺之生。逆曦年甫弱冠。因其來覲。留之禁衛。以繫人心。及挺之死。宜易以他將。逆曦在光宗朝。亦不過假守邊郡。侂胄既奏

一作殿巖

又納賂以縱其歸。復任西帥。付以全蜀。識者蓋已寒心。果挾強鄰以畔。人尤不能無疑于侂胄。而侂胄亦何辭以自解。藉曰無他。而虎兕出柙。咎將誰歸。以致皇甫斌之敗于唐州。李汝翼敗于符離。商榮敗于東海。郭倪敗于儀真。郭倪之抱頭鼠竄。僅以身免。將不素擇。兵不素練。輕舉妄動。自取困斃。殆理勢之必然。而所以致此者。抑有由也。蘇師旦起于筆吏之賤。侂胄奔走之舊。薦進寵用。不三四年。駸駸通顯。凡武臣之建節。非近屬懿戚。元勳宿將。不以輕畀。乃舉而授之。奴隸昔秦檜居相位。垂二十載。不爲不專。假寵使令。如賈瑍丁稷。不過武功大夫。未嘗處以朝廷職任。而師旦爲御帶。爲知閣門。爲樞密都丞。至乘旄鉞。此秦檜之所不敢爲。而侂胄敢爲之。師旦何知。習利亡恥。固其常態。旣爲侂胄所親信。遂招權納賄。其門如市。自三衙以至江上諸帥。皆立定價。多至數十萬緡。少亦不下十萬。□□致敗。

【案】此處脫文似不止二字。

侂胄不得已。

稍從黜責。諸將往往退有後言。謂吾債帥而責以戰。將途路籍籍。傳笑境外。遂益有輕視之心。師旦旋以敗露削籍投荒。雖加之罪。而心實不服。揚言于人。謂諸將賄賂非所獨得。蓋指侂胄而言。然則師旦之竄。

非專于伸國憲。亦侂胄藉之以自文。爾抑侂胄之專擅。尤有大可罪者。臣聞國家有大興作。謀及卿士。謀及庶人。禮曰。天子將出征。類乎上帝。宜乎社。造乎禰。禡於所征之地。受命于祖。受成于學。豈非兵凶器。戰危事。故謹重如此。侂胄之舉事。上不取裁于君父。下不詢謀于縉紳。至于陛下侍從近臣。有不得與聞。同列不能盡知者。甚至密諭諸將。出師之日。潛假御筆以行之。外庭曾不及見。已破泗州之後。曲爲之說。以罔聖聽。始諭詞臣降詔。迨浚邊連以敗報。悉皆蒙蔽。而密諭諸將第以捷聞。人情涵懼。幾不自保。幸祖宗德澤在人。逆曦授首。而敵亦以糧乏自遁。然而三邊兵民。死于鋒鏑。困于轉輸。淪于疫厲。室廬焚蕩。田業荒蕪。遺骸蔽地。哭聲震野。斯民何辜。而至此極。至于強敵頻年。僉刷皆吾中原赤子。彼惟重其族類。而虐用吾民。光化之戰。至驅僉軍。及俘繫老弱幾數千人。填塞壕塹。以渡軍馬。河南之地。十室九空。而兩淮四十餘年生聚。遂成邱墟。是南北數十一作百萬生靈之命。皆侂胄一人殺之也。皇天后土。能鑒陛下之心。雖

敵人亦知其非出于陛下之意。是以督府每遣小使使敵帥。書問往復。必以首謀姦臣爲言。使侂胄本無邪謀。以輕信誤國至此。亦當審察事勢。束身請罪。退就貶削。猶有辭于天下。乃偃蹇居位。靡閒惟容。惟遇報稍希。輒爲大言。每執己見。則曰。有以國斃。聞者縮首。夫國者太祖太宗高宗之國。而縱侂胄斃之可乎。方倚腹心以爲臺諫。文飾姦言。謂之一人心。定國論。以禁異議。怙終不悛。殆將罔測。夫以侂胄本以庸闇無知。養成姦惡。得罪天地。得罪祖宗。得罪舉國兵民。納侮強鄰。提孩孺子。口皆能言。心無不怨。而劫于積

威曾無一人敢爲陛下言者。賴陛下覺悟。出自英斷。特降御筆處分。且蒙聖恩。不以臣疎遠仁似。擢長憲府。臣雖見其辭免。而已入臺供職。亟舉其專權誤國之大者言之。其他罪惡擢髮不足以數。未暇枚舉。如陳自強者。昏老庸繆。本無寸長可取。徒以嘗假館于侂冑。由州縣小官。數年間汲引拔擢。以致陛下過聽。用爲次相。附阿充位。不恤國事。不遵聖訓。中書機務。唯唯聽命。一無可否。侂冑曰。兵當用。自強亦曰。當用。侂冑曰。事可行。自強亦曰。可行。每對客言。自強受恩深。只得從順。然則從之者歟。自強之罪。亦不可勝誅矣。若其貪黷無藝。政以賄成。鄙猥之狀。言之幾污口舌。臣亦未暇悉論。伏望陛下詳覽臣奏。將侂冑自強重賜貶竄。以荅天人之願。以釋兵民之忿。以彰有國之典。以慰死者之冤。使敵國聞之。必諒陛下本心。使將士聞之。必爲陛下戮力。忠義聞之。必爲陛下奮發而起。宗社幸甚。天下幸甚。取進止。貼黃。臣切惟太皇盛德節儉。帑藏儲積甚豐。側聞嘗有遺旨。除供治園陵用度外。以助陛下軍國之費。有內臣王鎔者。實主其事。盜竊既多。潛以奉侂冑。又與李昉、楊榮顯、毛居實、李大謙等。瓜分之下。至侂冑奴隸周筠、凌文彥、陳琮。亦皆盜取。當邊事未寧。用度極繁之時。豈應臣下因太后之喪。遂以爲利。且有違慈訓。伏乞睿旨。令所屬拘回。以俟處分。實爲允當。其李昉等。並究見情犯輕重坐罪。伏乞睿照。又小貼子。照得蘇師旦。因受結託。薦用庸繆。以致敗朝。上誤國事。雖已竄責。未正典刑。刀筆賤吏。原其誤國之故。死有餘辜。一作責 乞賜處分。蘇師旦既逐之後。堂吏史達祖、耿種、董如璧三名。隨卽用事。言無不行。公受賄賂。共爲姦利。伏乞睿斷。

將三名送大理寺根究。依法施行。實快士論。伏候敕旨。十一月十五日。三省同奉聖旨。依韓侂胄責授和州團練使。送郴州安置。陳自強追三官。送永州居住。內蘇師旦特決脊杖二十。配南昌化軍牢城收管。月具存亡申。王鎔等令臨安府究見情犯。申三省樞密院所合。拘回錢物。併委本府施行。史達祖耿棹董如璧。並送大理寺根究。

臣寮上言

臣聞書載舜之事曰。流共工于幽州。放驩兜于崇山。竄三苗于三危。殛鯀于羽山。四罪而天下咸服。當舜之時。可謂至治。而流放竄殛之刑行焉。蓋天討有罪。有不容恕也。恭惟陛下。光紹丕基。寅畏天命。寬仁恭儉之德。度越百王。凡在臣工。宜思盡忠。以輔成治道。而韓侂胄。緣肺腑。竊弄大權。蒙蔽聖明。擅作威福。首引羣邪。一作分布要途。排阻忠臣。陷之大戮。賊害善類。斥逐無餘。凡陛下親信之臣。有不利于侂胄。則

夫挾言路。以罔宸聽。私意既行。凶燄日熾。出入禁旅。恣爲欺罔。

一作盜欺

侵盜貨財。徧滿私室。交通賂遺。奔走

四方。鑿山爲園。下瞰宗廟。窮奢極侈。僭擬宮闈。十年之間。罪惡盈積。侂胄慮禍之及。思固其業。乃復設爲計謀。竊據平章軍國事。此乃祖宗所以待元老大臣。侂胄何人。乃以自處。安坐廊廟。紊亂紀綱。又于此時。輕開邊釁。上不稟于陛下。旁不謀之在廷。盛夏出師。挑患召釁。使添邊赤子。骨肉流離。肝腦塗地。死于非命者。不知幾萬人矣。昵比吳曦。利其厚賂。畀以節鉞。授之西兵。又使程松與之共事。取輕納侮。啓其姦心。

自非宗社之靈。忠義興起。則全蜀之地。豈不重貽陛下之憂。侂胄罪狀著明。人怨神怒。而猶專復自用。殊無悛心。以國事快己私。視民命如草芥。原其用意。欲以何爲。昔之所謂四凶。其罪復有大于此者乎。陳自強昏昧。闕穴本無寸長。徒以侂胄私人。驟加汲引。拔自選調。置之清華。曾未數年。躡登宰輔。兵燹既開。邊鄙不寧。復以自強兼領樞密。幸其徇己。倚爲腹心。而自強憑藉其威。不知顧忌。日暮途遠。貪得無厭。援引朋邪。濁亂班列。呼吸羣小。納賂賣官。請託公行。賊罪狼籍。訕笑譏罵。萬口一詞。社鼠城狐。蓋未有甚于此者也。仰惟陛下奮發英斷。斥此二姦。成命初傳。都人相慶。而猶畀以祠祿。未愜輿情。臣愚欲望聖明。將韓侂胄明正典刑。以謝天下。仍將陳自強削奪官爵。竄之遠方。則舜除四凶之事。復見今日。可以壯國勢。可以正人心。可以開忠直之門。可以弭窺覷之患。海內幸甚。所有錄黃。臣未敢書行。謹錄奏聞。伏候敕旨。十一月六日。三省樞密院同奉聖旨。並依韓侂胄送英德府安置。陳自強責武泰軍節度副使。依舊永州居住。

又臣寮上言

臣至愚極陋。初乏寸長。陛下過聽。擢任言職。臣辭不獲命。踴勉就職。自量無以補報高一作天厚地之恩。

惟遇事盡言。始爲無負。一有臣今早立班。恭聽麻制。竊見太師韓侂胄。罷平章軍國事。特進。陳自強罷右

爾字

丞相。姦人去國。分道開明。天下幸甚。社稷幸甚。然二人之罪。重于邱山。罰未傷其毫毛。雖曰朝廷欲存體

貌之禮。而罪大罰輕。公論沸然。臣職在言責。既有所聞。豈容緘默。請詳爲陛下陳之。侂冑始以肺腑蚤緣。寘身閣職。典司賓贊之事。不過若此而已。光宗皇帝以父傳子。國朝之家法。陛下賢聖仁孝。親承大統。加以慈福太皇太后重幃一作華之命。天命所歸。人心所向。臣子何功之有。侂冑乃以與聞內禪爲功。竊取大

權。自是以後。無復顧忌。童奴濫授以節鉞。嬖妾

一作倖

竄籍於宮庭。剽造亭館。震驚太廟之山。宴樂笑語。徹

聞神御之所。齒及路馬。禮所富誅。簡慢宗廟。罪宜萬死。其始也朝廷施設。悉令稟命。其後託以臺諫大臣之薦。盡取軍國之權。決之于己。且如御前金一作軍牌。祖宗專隸內侍省。而乃多自其私家發遣。至于調發

人馬軍期。並不奏知。此豈征伐自天子出之義。臺諫侍從。惟意自用。不恤公議。親黨姻婭。躡取美官。不問流品。名器僭濫。動違成法。竊弄威柄。妄開邊隙。兵端一啓。南北生靈。強者殞于鋒刃。弱者填于溝壑。流離凍餓。骨肉離散。荆襄兩淮之地。暴尸盈野。號啼震天。軍需百端。科斂州縣。海內騷然。迹其罪狀。人忿神怒。覆載之所不容。國人皆曰可殺。而況陛下卽位以來。以恭儉守己。一作位以仁厚化。一作保民無聲色玩好之

娛。無燕游土木之費。凡可以裕民生厚邦本者。無所不用其至。不惟人知之。天亦知之。不惟中國知之。四夷亦知之。自軍興以來。人情洶洶。物議沸騰。而侂冑鉗制中外。罔使陛下聞知。甚至宦官宮妾。亦其私人。莫敢爲陛下言者。至如西蜀吳氏。世掌重兵。頃緣吳挺之死。朝廷取其兵柄。改畀他將。此爲得策甚矣。侂

胄與曦結爲死黨。假之節鉞。復授以全蜀兵權。曦之叛逆。罪將誰歸。使曦不死。侂胄未可知也。人皆謂侂胄心無有極。數年之間。位極三台。一作公列爵爲王。外則專制東西二府之權。內則窺伺宮禁之嚴。姦心逆

節。具有顯狀。縱使侂胄身膏斧鉞。猶有餘罪。況邊釁未解。朝廷尙不明正典刑。則何以昭國法。何以示敵人。何以謝天下。今誠取侂胄肆諸市朝。戮一人而千萬人獲安其生。況比者小使之遣。金使嘗以侂胄首謀爲言。是金人亦知兵事之興。非出于陛下之意也。使誅侂胄而敵不退聽。則我直而彼曲。我壯而彼老。自然人心振起。天意昭回。以此示敵。何敵不服。以此感人。何人不奮。臣尙慮議者謂國朝家法仁厚。大臣有罪。止于竄斥。未嘗誅戮。臣切謂侂胄非大臣比也。祖宗之法。位至平章軍國者。皆東班也。元勳臣而後得有此。未有如侂胄一介武弁。自環衛而知閣。自知閣而徑爲平章太師者。若此則破壞祖宗成法。自侂胄始。乃亂法之姦臣。非朝廷之大臣也。侂胄既有非常之罪。當伏非常之誅。詎可以常典論哉。又竊見右丞相陳自強。素行污濁。志益貪鄙。徒以貧賤私交。自一縣丞超遷越授。徑登宰輔。不思圖報陛下之恩。惟侂胄之意自徇。侂胄始雖怙權。猶奉內詞。凡所設施。尙關廟堂。自強巧爲柔佞。上表力請平章軍國。侂胄驕心。乃貪榮而冒處。自強狡計。一作評因藉庇以營私。驅虎狼爲之前導。而狐狸舞于其後。自強之爲已深矣。姑以大者言之。用兵一事。舉國以爲不可。而自強曲爲附和。力援私黨。占據言路。以脅制天下之公議。至若縱容子弟。交通關節。饜養無厭。皆臣所未暇言。獨其姦儉附麗。贖亂國經。較其罪惡。與侂胄相去